

# CONTRIBUCION

**Tèma** : Revista, Orientacion

**Autor** : *Alan Roch*

## **Mancas del tèxte d'orientacion**

- Dins lo tèxte d'orientacion, cal insistir sus nòstra accion sus l'ensemble del territòri occitan. Es bon de ba rapelar fàcia als problèmas diversès nascuts per l'utilizacion del nom d'Occitania per la region centrala.

- Manca tanben dins lo tèxte unes punts sus l'ajuda e la difusion de la creacion artistica e tot çò que pertòca la comunicacion. De pas doblidar a un moment ont se torna parlar d'unas mobilizacions rapòrt a la preséncia de l'occitan a la television.

## **Sus la revista :**

Me trapi a aver mes en pagina unes 140 n° de la revista.

Devèm aver la discutida teorica e la discutida practica.

Sul plan practica, arriba pas tròp a seguir : fau la mesa en pagina amb un logicial vièlh ; soi pas maquetista : ai gaire cambiat la mesa en pagina en mai de 20 ans ! ; l'estampaire es mens reactiu que dins lo temps ; s'i ajustan los delais de liurason per la Pòsta : lo darrièr N° a mes mai d'un mes entre lo clavatge e la recepcion pels legeires. Lo monde an sauput l'Universitat R&PS una setmana aprèp son

debanament ! Aquò es ja un problèma bèl.

Saludi la regularitat del trabalh pel Cebièr e la reactivitat de Joan Blanc per la realizacion de las cobèrtas.

Farai pas un capitol sul plan financièr que sortir la revista còsta de mai en mai car e que los abonaments demessisson.

Mas se pausan un problèma de contengut qu'es mai que lo de la revista.

Se los articles tematics e puslèu fòra-actualitat arriban regularament (ecologia, istòria, punt de lenga, cosina), es pas totjorn lo cas per l'actualitat politica, sociala, economica de la vida dins las contradas occitanas, al mai prèp e del viscut del tarrenc.

Aquò val per la revista e pels rasals informatics del Partit, ont se parla fòrça (e benlèu tròp) del cossí los faire foncionar, mas ont lo contengut es pas pro en presa amb las actualitats.

Se una còlha novèla vòl prene en carga la revista (papièr o informatica), ne serai plan content. Me daissariá temps per faire articles vertadièrs e non redigir tampa-traucs per clavar los n°.

